

凡流必遭殃咎慎密修持神明護佑廣施陰德神仙必有

許真君石函記卷下

九轉流珠神仙九丹經卷上

之七

太清真人述

前闕

丹砂所出非一郡縣也故言婚親多也道士持戒游五都五都者五嶽也欲作神藥也其子四千者市水銀也金銀加者鉛與水銀合故言金銀加也子明炊婦與赤爐者水銀與玄黃合在土釜中也故言與赤爐者土釜名也水銀者釜也言水銀與鉛合大怒欲飛赤故言口牙用口牙如黃真多者言鉛與水銀合變化生玄黃也蒸覆黍筍中如已者言飛精玄黃當百蒸之也故曰蒸覆黍筍頭中如已黍筍者謂生竹筍也子明惶惻內懷河車子明者水銀水銀得火逃鉛中也鉛一名河車故言內懷河也隣里雄黃及丹砂轉相和解謝其家者言當以雄黃水丹砂水和飛精也故言謝其家也牡蠣赤石脂使不邪者當以牡蠣赤石脂封塗兩土釜表裏內外令各厚三分也使不邪者使神藥諸飛精不敢逃飛去也故言使不邪也言取牡蠣二十斤

合赤石脂治之令如粉和以百日醞和如泥以塗土釜表裏厚各三分封塗之令陰乾十日乃飛水銀與玄黃合火之九上九下如雪霜紫色色若蒸華後乃相聽兩性和兩性和者言藥不敢飛亡與玄黃合也故言兩性和也日暮腸動應感加者兩藥和合也故言腸動應感加也夫妻共戲色忽華陰陽以會樂不過樂不過者神藥成室家大喜故言不過也即日生子如積沙者言水銀與玄黃俱飛著上土釜如積沙也銅羽次藥土龍和者言銅羽者三歲雄雞羽也言欲掃藥當以雄雞羽掃之取上飛精也土龍和者當以白頸蚯蚓汁和丹華也和以復飛之故言土龍和也可化金銀者言丹華用一刀圭粉鉛汞一斤居猛火上須臾立成黃金也故言可化金銀也水黃牙也一斤與一銖者言取九飛丹華一銖以粉水銀一斤若粉鉛錫一斤皆成黃金也故言斤與一銖慎無多也多者金剛不中推少者金弱不中推故言斤與一銖慎無多也食如黍粟飛相過者飛上天也坐知天

地者言服丹華須臾飛上盡見天上諸神也
 遠見他者言目大明視萬里也故言遠見他
 忽然萬里渡江河者言服丹華一日一夜忽
 飛萬里不拘江河也行不用船乘雲氣也
 故言忽然萬里渡江河也以龍為馬雲為車
 者言飛入青雲從太一真人也時入天門見
 大家者言上天見天上真人之居也故言時
 入天門見大家也身比日月在欲何者言服
 丹華身得不死與日月同光恣心所欲不拘
 天地不拘王法故言身比日月在所欲何也
 盡見賢聖相對羅者言見真人太一諸神仙
 相對坐也故曰盡見賢聖相對羅也靈龜駢
 鶴神蝦蟇者天上神龜蝦蟇亦皆得仙伯牙
 鼓琴玉女齊歌青腰起舞悲相和悲相和者
 太一真人從酒作倡也念我父母悲痛早死
 不知道也但獨煩冤當奈何我父母眷屬皆
 已早死痛不得藥也身遂服食神丹華邪氣
 不害疾不過也言服丹華百病皆愈故言疾
 不加也幸得度世吉無他吉無他身壽萬世
 從真人也幸得度世萬餘年也子好學之可

得仙也

解曰治丹華法取礬石戎鹽消鹹礬石四
 物先燒之二十日東海牡蠣取左顧者赤
 石脂滑石凡七物分等多少自在合治萬
 杵令如粉於鐵器中火之九日九夜猛其
 火藥正赤如火可復治之萬杵下解支節
 和以善百日醱以和諸藥名曰六一泥以
 塗兩赤土釜內外各厚三分曝之日中十
 餘日令乾燥以取胡粉燒之令如金色可
 復取玄黃分各等和以百日華池令如泥
 治之萬杵以塗兩赤土釜裏厚三分復塗
 其外厚三分曝之十日令大乾燥因內朱
 兒二斤去土釜中作藥多少自在下用朱
 兒一斤上至十斤若百斤作藥無常多少
 自在貧人少作富人多作土釜令受八九
 升大者受一斗半土釜榮陽河南洛陽及
 潁川郡者大多一枚直十四五錢耳皆先
 調塗以六一泥塗其內外各厚三分曝十
 日令乾燥乃可用也因內朱兒土釜中封
 塗之令乾燥十餘日及釜口際會無令洩

洩者朱兒飛去先以通鄉煨火以壅土釜
 邊火去土釜五寸許通鄉者馬通也無馬
 屎用糠火煨之九日九夜推火附之九日
 九夜釜著火上復九日九夜火壅釜半復
 九日九夜凡火之四九三十六日可復一
 日寒發之朱兒皆飛著上釜以雄雞羽掃
 取之色紫赤五彩琅玕或如奔星鴻赤或
 如霜雪或正赤如丹一斤減四兩耳藥伏
 火不起名曰丹華和以龍膏丸之大如小
 豆置猛火上以鼓囊吹之飯頃成黃金不
 飛藥成粉乘一斤以二十四銖火之即成
 黃金矣以作金銀箔以盛藥欲服藥大如
 小豆向日再拜服之藥不伏火者當復飛
 之和以玄水灼龍膏澤令濕泥復置玄
 黃赤土釜中封際如法猛火飛之復三十
 六日藥成凡七十二日畢矣
 凡欲作藥時始以甲子開除日大吉合藥先
 齋戒三日乃為之合藥不過二人至三人二
 人同心其利斷金致加精勿入汗穢家欲飛
 藥時釜邊施祭以清酒香餅等黃梁米飯一

斗大囊三斗熱一斗凡用三案案用三杯統
香起再拜祝曰小兆臣某甲今日治藥九丹
唯神明神仙玄女素女青腰玉女共成之唯
大道君老君太和君令小兆臣某甲食生藥
神仙行酒起再拜九拜畢詞曰唯道君玄女
願令藥不飛亡皆令伏火藥色好善隨手變
化黃白悉成服藥飛騰朝於紫宮命長無極
位至真人因上酒凡上酒畢諸赤木實摘實
皆上之欲作神藥勿令愚人婦女小兒喪家
汗人見之及妬嫉多口之人若不好道勿使
見知也使藥不成慎勿令賓客婦女在藥傍
何者作藥欲得寂然無聲響神藥乃成愚人
不信道疑道謂無神藥故不使見也使藥不
成謹候視之無令釜有坑穿缺傷者有如髮
穿蟻鼻者藥皆飛去亡其精神失其鬼魄但
得其石又失其重寶即藥不良服之無益於
人神藥一銖投水銀一斤火之即成黃金不
成黃金藥不可服也故玄女曰金可作世可
度金不可作但自誤即以丹一銖粉鉛錫水
銀各一斤粉之皆成金銀故言斤斤與一銖

慎無多也常以平旦日出時東向再拜長跪
服之如未粟上士服之七日得仙昇九皇下
士服之七十日乃得仙愚人服之一年乃得
仙欲作神藥服藥時皆先齋戒沐浴五香不
如法藥不成也以丹華釜飛神符大善子無

貪財但飛神藥可得神仙勿得妄傳

真人曰第二之丹名神符本生太陽河伯餘
本生太陽者言水銀本生太陽也太陽者丹
砂也生於丙丁丙丁者火精上為熒惑星下
為丹砂也故言生於丙丁丙丁居南方為太
陽故易營虛日南方為太陽太陽者丹砂生
於日日生於火火日之子北方壬癸為太陰
太陰者水也故易營虛月北方生磁石磁石
者鉛也其精上為北辰星生坎坎位在北方
離位在南方河伯餘者水銀也取水銀多少
自在置赤土釜中飛之九上九下和以鯉魚
膽復取水銀多少自在復封塗閉固如法丹
華法復九上九下和以龍膏名曰神符其子
四千相與俱者謂曾青礬石戎鹽硫黃也故
言相與俱也河上姤女誠獨妹娥眉白易如

明珠長沙好砂色由由少小貞信不用夫東
西南北父母俱身不沾汗清若珠好待賢士
相待須勇悍敢語言若書安心懷能才有餘
不投人女妄吹噓河上姤女者鉛黃華也子
明媒之使共居也賢士者水銀子明媒之使
共居者言取鉛黃華一斤置鐵器中以炭火

之即復取水銀七斤投鉛中猛火煅之須臾
精華俱上出現狀若黃金紫赤狀若流星似
流珠五色玄黃即以鐵七接以取之得九一
之斤即三化九轉名曰丹黃之華一名玄黃
之洵一名天地之符即以治承化為丹名曰
還丹乃名曰仙藥神丹聖人秘之非凡俗道
人所當見知自非賢聖開通導達殊人乃能
知之故書不盡言言不盡意也故經曰丹精
生日精光明也日子者火也故火名子明也
水銀亦名子明故易營虛日丹精生日太陰
生月位在北方坎其數一故能知一萬事舉
一者鉛也鉛精生月鉛精名太陰石一名金
公一名河車一名河上姤女一名立制石凡
愚之人治藥反用山中立制石非也去道萬

里真人自以鉛黃華變化立制石膽皆出鉛中凡愚民方士好事者治藥反用羗里石膽非也去道萬里治藥由不成也真人自以丹砂精化為流珠雪霜鉛精俱化為還丹黃白乃成服之神仙矣不用此二物治藥雖得丹服之由復死矣太陰者鉛也太陽者丹砂也太陰者坎位在于太陽為離位在午故坎生月離生日也日為夫月為婦也日為雄月為雌也磁石鉛屬太陰位在子其數一丹砂屬陽位在午其數九雄黃屬土其數五故曰一五九凡十五故真人名為三五知三五橫行天下能知三五以治藥為還丹服之耳得長生不死故曰橫行天下故真人曰能知三奇六儀何用餘為丹砂為雄鉛為雌故傳曰父三奇母六儀審知此道何用封侯為此之謂也子明媒之使共居者言取水銀九斤鉛一斤合置赤土釜中猛火上從平旦至日落下時水銀與鉛精皆俱出如黃金色名曰玄黃精一名黃芽一名黃輕以丹華水之名曰黃池一名黃華一名黃龍一名玄制石取玄黃

和以玄水令如封泥丸之內赤土釜中封以六一泥內外厚三分令乾十日無令洩以馬通若糠火火之八十一日當庚辛庚辛者黃金之名也真人秘之不言黃金故字金為庚辛取玄黃一刀圭納猛火中以夾囊鼓炊之飯頃皆消成庚辛不成庚辛火之飛去藥生不可服也當納赤土釜中火之如前封塗之九九八十一日藥乃可用也玄黃一名伏丹一名紫粉欲服之常以甲子日平旦東向日再拜服如小豆日吞一九百日百病皆愈玄黃藥治大癩大癩百日皆愈無所不治子明媒之使共居與不相聽欲上書後復會面神丈夫欲上書者水銀未與鉛和合也復會面神丈夫者水銀也子明迫之者用火也子明迫用赤釜者赤土釜也子明者火也後竟相聽色由由言鉛與水銀合飛之為玄黃也色由由者藥色殊好也夫從外來婦從內來魚水相得乃食行相須四時生子若神盧五色光顏厚寸餘言雌雄相得不復飛去也即復取玄黃和以百日華池令如泥以直兩赤釜

裏及外內厚三分因納水銀三斤於其中亦可納十斤水銀作藥多少自在飛三斤水銀可以飛一人耳今一人得道仙去其藥少故也飛一斤可得十兩飛玄黃耳言取一斤水銀納赤土釜中覆以玄黃其上厚二寸所以一土釜合之封塗以六一泥如治丹華法以馬通糠火火之九日九夜水銀皆飛上著釜裏狀如雪霜紫赤鴻生五色也故言五色光顏厚寸餘以毛羽掃取之和以黃成若復如初也黃成者黃狗膽也若和以河伯餘者鯉魚膽也即取鯉魚膽和飛雪霜者水銀飛精合如封書泥丸之復納赤土釜中復以玄黃精覆之厚一寸以一赤土釜合蓋之以六一泥封塗釜口際會無令洩置日中曝之十日大乾燥乃可煨之煨者不可燒也稍熱釜圻也夫大藥也復火之九日九夜可止後一日寒發之以羽毛掃取上飛精鴻紫名曰神符還丹和以龍膏丸如小豆常以平旦東向日再拜長跪服之百日與諸神仙玉女相隨從諸神行如飛也欲渡江河海以神符丹和以

龍膽膏若鯉魚膽塗兩足下以渡江海河淮
渭濟以行水上足不濡者不溺沒故言足不
濡得道度世百病除身得不死無百病也服
藥百日腹中三蟲三尸皆自壞敗死下也土
龍魚膽皆陰精也水銀者陽精也故陰能制
陽為藥伏不敢起也真人仙人秘不得
傳真人曰第三之丹名神丹五色參差誠可
觀本自正陽武都閻者言真雄黃雌黃皆出
正陽武都武陽亦有雄黃潔淨白面又大神
者言八石之中雄黃雌黃辟五兵治百病尤
大神良潔淨白面者取鮮好者也得賢士
兩萬錢者言能飛雄雌得其飛精一刀圭價
直萬錢面色較好日燻者言飛雄雌藥生五
色好也晨昏夜暮出遊止名山者言以火飛
精在上釜故言止名山方士劫之不敢焉言
道人以赤土釜二枚合飛之不敢者不令其
飛精去取下土石也取其飛精也言法取雄
黃二斤雌黃一斤凡三斤小以華池傳藥乃
不敢散飛去華池者百日醞取雄雌合納鐵
臼中治之萬杵合和如粉納赤土釜中蓋以

玄黃粉上下左右各厚一寸以六一泥封釜
無令洩曝乾之十日乃可以馬通火飛之九
日九夜火去釜邊五寸以火壅之九日九夜
推火至釜下猛其火九日九夜以火壅之至
釜半火之復九日九夜可四九三十六日後
一日寒發以雞羽毛掃取飛和以龍膏復飛
之如前治丹華法火之三九二十七日止後
一日寒之發以雞羽毛掃取之名曰飛精即
治以為藥名曰神丹道士服之即神仙亦不
過百日仙矣下愚服之一年乃仙去非有鬼
神藥使然凡人男女俗人小兒服藥皆神仙
服之擊之皆大神子明合會使相親子明者
火使相親也雄雌合得火飛精善塗其際致
令堅以六一泥塗土釜內外上下各厚三分
先以玄黃和以華池令如泥以塗兩赤土釜
裏無令洩故言致令堅壯蠟赤石脂磁石凡
三物分各等治之萬杵令如粉和以左味先
以華池平均其中令不津不洩取上飛雄雌
黃精和以龍膏物相因言治九丹神藥飛精
不得龍膏藥不神故言和以龍膏物相因食

之不死壽萬年也坐使諸神言服神丹百日
諸仙下迎真人王女玉童素女青腰諸百鬼
山卿澤尉皆來侍從道人度世無種事在人
耳奴婢雜狗皆可得仙凡人服藥亦皆然居
必僻處言欲服神丹當居深山石室中大澤
中近水涯谷空宅也慎無與俗間愚人通語
言作藥無令妬嫉人多口人不好道人知也
無與葬埋娶婦嫁女家通常獨卧一室中神
仙玉女必來降敬畏神者言服神丹天神仙
人玉女求下人必恭敬事之深思天道無敢
懈怠常居石室依山者欲合藥服藥當深
里大澤無人之處亦非俗人所當見知也必
居深山巖石間能得神丹皆昇天神丹既成
舉家仙矣百官難大青雲間世皆歷盛去甚
難言世人貪財不肯合神藥反服草藥導引
因復死不壽矣故言去甚難夫草藥可以治
人百病不能使人長生久壽何以言之夫草
藥埋之即腐煮之即焦故草不能自生何能
使人長生乎
真人曰第四之丹名還丹男子兄弟通九人

九人者言藥凡有九物以為土釜以為首也取礬石礬石代赭或鹽牡蠣赤石脂土龍尾雲母滑石凡九物皆燒之一日一夜猛其火皆搏治令如粉和以醴令如泥以用直塗土釜裏內外各厚五分令陰乾十日即納水銀土釜中以雄黃覆其上次以曾青次以礬石次以硫黃次以鹵鹹次以太一禹餘糧次以礬石礬石獨在上凡七物各異治之令如粉水銀一斤獨在下餘次第之釜合上即以六一泥和善醴封塗其際勿令洩曝乾之十日即置鐵五柱上令高九寸以馬通或糠火煨去土釜底五寸微其火九日九夜復增火至釜半復九日九夜常以濡布加覆釜上令藥不飛亡布乾輒復濡之如治丹華法凡九九八十一日藥成皆飛上著生五色即以雞羽掃取之合以百草華以井華水服一刀圭卧石室中令人不飢渴百歲渴飲石泉飢則少食粟粟二十枚靜處思神藥曰一服服藥百日朱雀鳳凰翔其上玉女至服藥二百日仙人與俱遊服之一年太一迎之以還丹塗錢

用市物錢皆自還丹書目眠卧惡鬼皆走去一刀圭粉水銀一斤火之立成黃金當用龍膏和之九日九夜乃成真黃金矣

九轉流珠神仙九丹經卷上

七七

十三

正一天師清微弟子 洪百堅 製作

道教學術資訊網站

九轉流珠神仙九丹經卷下 之八

太清真人述

真人神水法

真人曰第五之丹名曰餌丹本自長沙武陵士太一旬石朱氏子朱氏子者水銀也武陵士者雄黃也太一旬石者禹餘糧也法取水銀一斤雄黃一斤治之如粉加水銀上禹餘糧一斤治之如粉加雄黃上納土釜中以一釜合之口際封以六一泥令乾燥以馬通或糠火之九日九夜更以炭火之九日九夜藥皆飛著上釜上子明媒之與賢士者子明火也賢士者黃金俱與水銀合入天雄和以龍膏少室人雄分各等神爵子者雞子也服一刀圭忽然萬里仙去渡江海也服之不久三旬者三十日能飛矣諸神往來衛左右者萬神侍從皆事已玉女青腰皆可使乘自然之車上昇天也從玉女天下之神皆事已百神墟里杜稷風伯雨師諸神皆來事已故名第五之丹母一名餌丹也

真人曰第六之丹名鍊丹所出微妙諸神仙